

欽定古今圖書集成

曆象彙編歲功典



欽定古今圖書集成曆象彙編歲功典
第四十七卷目錄
孟夏部紀事

歲功典第四十七卷

孟夏部紀事

汲冢周書維四年孟夏王初祈禱於宗廟乃嘗麥於太廟

拾遺記周昭王二十四年塗修國獻青鳳丹鵠各一雌一雄孟夏之時鳳鵠皆脫易毛羽聚鵠翅以爲扇緝鳳毛以飾車蓋一名遊飄二名條翻三名虧光四名仄影時東甌獻二女一名延娟二名延娛使二人更搖此扇侍於王側輕風四散泠然自涼

左傳晉人徵朝於鄭鄭人使少正公孫僑對曰溴梁之明年公孫夏從寡君以朝於君見於嘗酎與執燔焉疏月令言飲酎當是夏祭之後此言嘗酎謂見於夏祭故云與執燔焉

漢書郊祀志文帝卽位十三年明年黃龍見成紀其夏下詔曰有異物之神見於成紀母害於民歲以有年朕幾郊祀上帝諸神禮官議毋諱以朕勞有司皆曰古者天子夏親郊祀上帝於郊故曰郊於是夏四月文帝始幸雍郊見五時祠衣皆上赤又明年夏四

月文帝親拜霸渭之會以郊見渭陽五帝五帝廟臨渭北穿蒲池溝水權火舉而祠若光輝然屬天焉

景帝本紀後二年夏四月詔曰雕文刻鏤傷農事者也錦繡纂組害女紅者也農事傷則饑之本也女紅害則寒之原也夫饑寒竝至而能亡爲非者寡矣朕親耕后親桑以奉宗廟粢盛祭服爲天下先不受獻減大官省繇賦欲天下務農蠶素有畜積以備災害彊母攘弱衆母暴寡老者以壽終幼孤得遂長武帝本紀建元元年夏四月己巳詔曰古之立教鄉

古今圖書集成
里以齒朝廷以爵扶世導民莫善於德然則於鄉里先者艾奉高年古之道也今天下孝子順孫願自竭盡以承其親外迫公事內乏資財是以孝心闕焉朕甚哀之民年九十以上已有受鬻法爲復子若孫令得身帥妻妾遂其供養之事

元封元年夏四月癸卯上還登封泰山降坐明堂

元封二年夏四月還祠泰山至瓠子臨決河命從臣將軍以下皆負薪塞河隄作瓠子之歌

十洲記鳳麟洲煮鳳喙及鱗角合煎作膏名之爲續

弦膠或名連金泥能續弓弩已斷之弦刀劍斷折之金更以膠連續之使力士掣之他處乃斷所續之際終無斷也武帝天漢三年四月西國王使至獻此膠四兩武帝幸華林園射虎而弩弦斷使者時從駕又上膠一分使口濡以續弩弦帝曰異物也乃使武士數人共對掣引之終日不脫如未續時也膠色青如碧玉

武帝天漢三年四月西國王使至獻吉光毛裘裘黃色蓋神馬之類也入水數日不沉入火不焦

漢書武帝本紀太始四年夏四月幸不其祠神人於交門宮若有鄉坐拜者作交門之歌注神人蓬萊仙人之屬也琅邪縣有交門宮武帝所造

昭帝本紀元鳳二年夏四月上自建章宮徙未央宮大置酒賜郎從官帛及宗室子錢人二十萬吏民獻牛酒者賜帛人一疋

趙充國傳四月草生發郡騎及屬國胡騎伉健各千倅馬什二就草

宣帝本紀本始元年夏四月詔內郡國舉文學高第

各一人

地節二年夏四月鳳凰集魯郡羣鳥從之

五鳳四年夏四月遣丞相御史掾二十四人循行天下舉冤獄察擅爲苛禁深刻不改者

甘露元年夏四月黃龍見新豐

雲笈七籤茅盈字叔申咸陽南關人也漢宣帝時二弟俱貴鄉里相送者數百人時盈亦在座謂賓曰我來年四月三日當之官能如今日之集會不衆許之至期日衆賓竝集盈與家人及親族辭訣歸句曲人

因改句曲爲茅君山

漢書元帝本紀初元元年夏四月詔曰方田作時朕憂蒸庶之失業臨遣光祿大夫褒等十二人循行天下存問耆老鰥寡孤獨困乏失職之民

初元五年夏四月詔令從官給事宮司馬中者得爲大父母父母兄弟通籍注司馬門者宮之外門也

建昭四年夏四月詔舉茂才特立之士
後漢書光武本紀建武七年夏四月壬午詔公卿司隸州牧舉賢良方正各一人遣詣公車

建武十三年夏四月大饗將士班勞策勳功臣增邑更封凡三百六十五人

建武十四年夏四月辛巳封孔子後志爲褒成侯注平帝封孔均爲褒成侯志均子也古今志曰志時爲密令

祭祀志光武中元元年四月以吉日刻玉牒書函藏金匱璽印封之使太尉奉匱以告高廟藏於廟室西壁石室高主室之下

明帝本紀永平六年王雒山出寶鼎廬江太守獻之

古今圖書集成
夏四月甲子詔曰祥瑞之降以應有德方今政化多僻何以致茲易曰鼎象三公豈公卿奉職得其理耶太常其以禘祭之日陳鼎於廟以備器用賜三公帛五十疋九卿二千石半之

永平九年四月甲辰詔郡國以公田賜貧民各有差永平十年夏四月戊子詔曰昔歲五穀登衍今茲蠶麥善收其大赦天下方盛夏長養之時蕩滌宿惡以報農功百姓勉務桑稼以備災害吏敬厥職毋令愆墮

永平十二年夏四月遣將作謁者王吳修汴渠十三年夏四月汴渠成辛巳行幸滎陽巡行河渠乙酉詔曰自汴渠決敗六十餘歲今旣築隄理渠絕水立門河汴分流復其舊跡陶丘之北漸就壤墳故薦嘉玉潔牲以禮河神東過洛汭歎禹之績今五土之宜反其正色濱渠下田賦與貧民無令豪右得固其利章帝本紀建初二年夏四月癸巳詔齊相省冰紈方空穀吹綸絮

魏志文帝本紀黃初五年夏四月立太學制五經課

古今圖書集成
試之法置春秋穀梁博士

晉書禮志魏太和元年四月洛邑初營宗廟掘地得玉璽方一寸九分其文曰天子羨思慈親明帝爲之改容以太牢告廟

武帝本紀泰始三年四月戊午張掖太守焦勝上言氏池縣大柳谷口有元石一所白畫成文實大晉之休祥圖之以獻詔以制幣告於太廟藏之天府

禮志武帝泰始七年四月帝將親祠車駕夕牲而儀注還不拜詔問其故博士奏歷代相承如此帝曰非

致敬宗廟之禮也於是實拜而還遂以爲制夕牲必躬臨拜

武帝本紀太康元年夏四月白麟見於頓丘

拾遺記張華爲九醞酒以三薇漬麴蘖蘖出西羌麴出北方北方有指星麥四月火星出麥熟而穫之蘖用水漬麥三夕而生萌芽以平日雞鳴時而用之俗人呼爲雞鳴麥以之釀酒醇美

幸蜀記咸康元年四月遊浣花龍舟綵舫十里綿亘自浣花潭至萬里橋遊人士女珠翠夾岸日正午暴

古今圖書集成
風起須臾電雷冥晦有白魚自江心躍起變爲蛟形騰空而起是日溺者數千人衍懼卽時還宮

洛陽伽藍記昭儀尼寺有一佛二菩薩塑工精絕四月七日常出詣景明景明三像恆出迎之

後燕錄長樂元年夏四月甲午有異雀素身綠首集於端門棲翔東園二旬而去

南史宋文帝本紀元嘉二十四年四月河濟俱清

宋書劉敬宣傳敬宣八歲喪母晝夜號泣中表異之輔國將軍桓序鎮蕪湖父牢之參序軍事四月八日

敬宣見衆人灌佛乃下頭上金鏡以爲母灌因悲泣不自勝序歎息謂牢之曰卿此兒旣爲家之孝子必爲國之忠臣

世說范甯作豫章八日請佛有板衆僧疑或欲作答有小沙彌在坐末曰世尊默然則爲許可衆從其義佛國記法顯到于闐國其國中十四大僧伽藍不數小者從四月一日城裏便灑掃道路莊嚴巷陌其城門上張大幃幕事事嚴飾王及夫人采女皆住其中瞿摩帝僧是大乘學王所敬禮最先行像像入城時

古今圖書集成
門樓上夫人采女遙散衆花紛紛而下至十四日行像訖王及夫人乃還宮

南史齊高帝本紀益州有山古老相傳曰齊后山昇明三年四月二十三日有沙門元暢者於此山立精舍其日上登尊位

昇明三年四月二十四日滎陽郡人尹千於嵩山東南隅見天雨石墜地石開有玉璽在其中璽方三寸文曰戊丁之人與道俱肅然入草應天符掃平河洛清魏都又曰皇帝運興千奉璽詣雍州刺史蕭赤斧

赤斧以獻

資治通鑑梁天監元年夏四月癸酉詔公車府謗木肺石旁各置一函若肉食莫言欲有橫議投謗木函若有功勞才器冤沈莫達者投肺石函

梁書海南傳干陀利國在南海洲上天監元年其王瞿曇修跋陀羅以四月八日夢見一僧謂之曰中國今有聖主十年之後佛法大興汝若遣使貢奉敬禮則土地豐樂商旅百倍我當與汝往觀之乃於夢中至中國拜觀天子既覺心異之陀羅本工畫乃寫夢

古今圖書集成
中所見高祖容質飾以丹青仍遣使并畫工奉表獻
玉盤等物使人既至模寫高祖形以還其國比本畫
則符同焉因盛以寶函日加禮敬

高僧傳釋元高小名靈育母寇氏夢見胡僧持傘者
花滿坐便即懷胎至四月八日生異香及光明照壁
迄旦乃散因名曰靈育

靡歌利頭四月八日浴佛以都梁香爲青色水鬱金
香爲赤色水丘隆香爲白色水附子香爲黃色水安
息香爲黑色水以灌佛頂

陳書高祖本紀未定二年四月戊辰重雲殿東鴟尾
有紫烟屬天

南史陳宣帝本紀太建七年四月壬子郢州獻瑞鐘
六

陳書宣帝本紀太建八年四月甲寅詔曰元戎凱旋
羣師振旅旌功策賞宜有饗宴今月十七日可幸樂
遊苑設絲竹之樂大會文武

魏書釋老志世祖卽位每引高德沙門與共談論於
四月八日輿諸佛像行於廣衢帝親御門樓臨觀散

古今圖書集成
花以致禮敬

禮志神廡二年帝將征蠕蠕省郊祀儀四月以小駕祭天神畢帝遂親戎大捷而還歸格於祖禰徧告羣神

靈徵志高宗和平三年四月河內人張超於壞樓所城北故佛圖處獲玉印以獻印方二寸其文曰富樂日昌永保無疆福祿日臻長享萬年玉色光潤模制精巧百寮咸曰神明所授非人爲也詔天下大酺三日

孝文帝本紀太和十六年四月甲寅幸皇宗學親問博士經義

太和十九年四月庚申行幸魯城親祠孔子廟辛酉詔拜孔氏四人顏氏二人爲官又詔選諸孔宗子一人封崇聖侯邑一百戶以奉孔子之祀又詔兗州爲孔子起園柏修飾墳壟更建碑銘褒揚聖德

洛陽伽藍記景明寺宣武皇帝景明年中立至正光中太后始造七級浮圖一所去地百仞時世好崇福四月七日京師諸像皆來此寺尚書祠曹錄像凡有

一千餘軀至八日以次入宣陽門向閭闔宮前受皇帝散花於時金花映日寶蓋浮雲幡幢若林香煙似霧梵樂法音聒動天地百戲騰驤所在駢比名僧德衆負錫爲羣信徒法侶持花成藪車騎填咽繁衍相傾

四月八日京師士女多至河間寺觀其殿廡綺麗無不歎息以爲蓬萊仙室亦不是過入其後園見朱荷出池綠萍浮水飛梁跨樹層閣出雲咸皆唧唧

長秋寺中有三層浮圖一所金盤靈刹耀諸城內作六牙白象負釋迦在虛空中莊嚴佛事悉用金玉四月四日此像常出辟邪師子導引其前吞刀吐火騰驤一面綵幢上索詭譎不常奇伎異服冠於都市像停之處觀者如堵

北齊書杜弼傳武定六年四月八日魏帝集名僧於顯陽殿講說佛理弼與吏部尚書楊愔中書令邢劭祕書監魏收等竝侍法筵勅弼升師子座當衆敷演昭元都僧達及僧道順竝緇林之英問難蜂至往復數十番莫有能屈帝曰此賢若生孔門則何如也

古今圖書集成
周書于謹傳保定三年四月詔以謹爲三老賜延年杖

荆楚歲時記荆楚以四月八日諸寺各設會香湯浴佛共作龍華會以爲彌勒下生之徵也

四月八日長沙寺閣下有九子母神是日市肆之人無子者供養薄餅以乞子往往有驗

隋書食貨志大象二年四月詔四面諸關各付百錢爲樣從關外來勘樣相似然後得過樣不同者卽壞以爲銅入官

文帝本紀開皇七年四月癸亥頒青龍符於東方總管刺史西方以騶虞南方以朱雀北方以元武

續高僧傳釋寶巖幽州人仁壽下勅召送舍利於本州弘業寺四月三日夜放大光明照天地有日皆見古鏡記汾陰侯生天下奇士也王度常以師禮事之臨終贈以古鏡大業八年四月一日太陽虧度時在臺引鏡出鏡亦無色俄而光彩出日亦漸明比及日復鏡亦精朗如故

續文獻通考隋朱昌寧永城人有孝行母病思瓜時

古今圖書集成
方四月瓜未熟昌寧號哭於瓜田中一夕瓜盡熟母食之卽差

輝縣志衛源廟在蘇門山麓百門泉上泉乃衛河之源廟創於隋以祀泉神稱靈源公每歲四月八日郡守致祭

唐書高祖本紀武德三年四月丙申祠華山

唐會要武德六年四月十四日幸龍潛舊宅改爲通義宮置酒高會詔曰爰擇良辰言遵邑里禮同過沛事等歸譙故老咸臻族姻斯會肅恭薦享感慶兼集

武德七年四月丙午宴王公親屬於文明殿見安平王太妃以尊屬從家人禮降階再拜酒小闌徙坐翠華殿帝賦詩王公遞上壽賜帛各有差

武德九年四月二十三日甘露降於中華殿之桐木泣如冰雪以示羣臣

貞觀二年四月三日尚書左丞戴胄上言曰隋開皇之制天下輸粟謂之社倉及大業中取充官費今請自王公以下計墾田秋熟所在爲義倉歲凶以給民太宗善之乃詔畝稅二升粟麥秔稻隨地所宜寬鄉

斂以所種狹鄉據青苗簿而督之耗十四者免其半
耗十七者皆免之商賈無田者以其戶爲九等出粟
自五石至五斗爲差下戶不取焉歲不登以賑民或
貸爲種子至秋而償

魏徵醴泉銘序貞觀六年孟夏皇帝避暑九成宮四
月甲申朔旬有六日上及中宮歷覽臺觀閒步西城
俯察厥土微覺有潤因而以杖導之有泉隨而涌出
乃承以石檻引爲一渠其清若鏡味甘如醴

唐會要貞觀十四年四月二十二日太宗自爲真草

書屏風以示羣臣筆力遒勁爲一時之絕

太宗以陰陽書近代訛僞穿鑿拘忌亦多命太常博
士呂才及陰陽學者十餘人共加刊正削其淺俗存
其可用者貞觀十五年四月十六日己酉撰陰陽書
凡五十三卷及舊書四十七卷詔頒行之才爲敘質
以經史其穿鑿拘忌者才有駁議曰敘宅經敘祿命
敘葬書識者以爲確論

貞觀十六年四月二日有雄雉飛集明德殿前上問
褚遂良是何祥也遂良對曰昔秦文公時有童子化

古今圖書集成
爲雉雌者鳴於陳倉雄者鳴於南陽童子言得雌者
伯文公遂以爲寶雞祠漢光武得雄遂起南陽而有
四海陛下舊封秦王故雄雉見於秦地所以彰表明
德也上大悅曰立身之道不可無學

貞觀二十一年四月九日公卿上言請修太和宮厥
地清涼可以清暑詔從之包山爲苑自栽木至設幄
九日畢工因改爲翠微宮

貞觀二十四年四月太宗御製玉華宮銘令皇太子
以下竝和

顯慶五年四月八日於東都苑內造八關涼宮

唐高宗實錄麟德二年四月二十五日講武邙山之
陽御北城樓觀之

唐會要乾封三年四月將作大匠閻立德造九成宮
新殿成移仗御之謂侍臣曰朕性不宜熱所司頻奏
請造此殿旣作之後深懼人勞今暑熱朕在屋下尚
有流汗匠人暴露事亦可憫所以不令精妙意者祇
避炎暑爾長孫無忌曰聖心每以恤民爲念天德如
此臣等不勝幸甚

古今圖書集成
唐書高宗本紀總章元年四月乙卯贈顏回太子少師曾參太子少保

唐會要明皇初臨潞州景龍元年四月二十七日日有抱戴

明皇初臨潞州景龍二年四月二十五日廳事據案假寐白鶴觀道士見赤龍在案

唐詩紀事景龍四年四月一日幸長寧公主莊李乂陪幸詩紫禁乘宵動青門訪水嬉貴遊鱣序集仙女鳳樓期合宴簪紳滿承恩雨露滋北辰還捧日東館

幸逢時

景龍四年四月六日幸興慶池觀競渡之戲其日過竇希玠宅學士賦詩

舊唐書中宗本紀景龍四年四月乙未幸隆慶池結綵爲樓宴侍臣泛舟戲樂

景龍文館記四年夏四月上與侍臣於樹中摘櫻桃恣其食未後於葡萄園大陳宴集奏宮樂至暝每人賜朱櫻兩籠也

唐會要景雲二年四月賀拔延嗣除涼州都督充河

古今圖書集成
西節度自此始有節度之號

垂拱二年四月七日撰百僚新誠及兆人本業記頒賜朝集使

通典天后萬歲通天元年四月三日鑄九鼎成置於明堂之庭

開元二年四月敕在京有訴冤者竝於尚書省陳牒所司爲理若稽延致有屈滯者委左右丞及御史臺訪察聞奏

唐會要開元九年四月甲戌上親策試應制舉人於

含元殿

開元十一年四月二十六日庚申崇飾霍山祠廟秩視諸侯

唐書元宗本紀開元二十六年四月己亥有司讀時令降死罪流以下原之

實錄開元二十八年四月庚辰有慈烏巢紫宸之拱唐會要天寶九載四月二十九日制曰頃者每祀黃帝乃就南郊禮亦非便宜於皇城內西南坤地改置黃帝壇朕當親祀以昭誠敬

天寶十載四月二十一日興慶宮造交泰殿成
乾元元年四月詔京官九品以上上封事
通典乾元二年四月兩省諫官十日一上封事直論
得失無假文言冀成殿最用存沮勸
唐會要乾元二年四月六日敕御史彈事仍服豸冠
舊制大事則豸冠衣朱衣纁裳白紗中單以彈之小
事則常服而已

杜陽雜編上崇奉釋氏每春百品香和銀粉以塗佛
室遇新羅國獻萬佛山可高一丈因置山於佛室山
雕沉檀珠玉成之其佛之形大者或逾寸小者七八
分其佛之首有如黍米者有如半菽者其眉目口耳
螺髻毫相無不悉具上因置九光扇於巖巘間四月
八日召兩衆僧徒入內道場禮萬佛山是時觀者歎
非人工及覩九色光於殿中咸謂佛光卽九光扇也
資治通鑑唐德宗建中元年夏四月癸丑上生日四
方貢獻皆不受注上生於天寶元年四月十九日不
置節名

舊唐書德宗本紀興元元年四月辛丑朔時將士未

古今圖書集成
給春衣上猶夾服漢中早熱左右請御暑服上曰將士未易冬服獨御春衫可乎俄而貢物繼至先給諸軍而始御之

唐會要金吾衛貞元二年敕四月一日巳後五更二點放鼓契

貞元十三年四月幸興慶宮龍堂禱雨有一白鷓鴣浮沉水際羣類翼從左右以爲龍之變化既而大雨續文獻通考呂崑字洞賓蒲州永樂縣人貞元十四年四月十四日巳時生異香滿室天樂浮空有白鶴

飛入帳中忽不見

韓愈祭鱷魚文維元和十四年四月二十四日潮州刺史韓愈使軍事衙推秦濟以羊一豬一投惡溪之潭水以與鱷魚食而告之

聞見後錄唐穆宗元和十五年四月四日河東節度使裴度奏五臺山佛光寺側慶雲現若金仙乘狻猊領其徒千萬自巳至申乃滅

唐會要太和四年四月有司貢新瓜獻興慶宮
開成二年四月辛酉建終南山祠宇

唐宣宗實錄大中七年四月日本國遣王子來朝獻寶器音樂帝曰近者黃河清今又日本來朝朕德薄何以堪之因賜百寮宴陳百戲以禮之

唐會要大中十年四月侍郎知舉鄭顥進諸家科目記十三卷敕付翰林自今放榜後寫及第姓名及所試詩賦題進入每歲編次

四月十祭自祀赤帝至雩祀園丘

釋苑宗規四月十五僧家結夏天下僧尼此日就禪刹掛搭謂之結制結制卽結夏夏乃長養之節在外

行恐傷草木蟲類故九十日安居至七月十五日散去爲解夏又謂解制

秦中歲時記四月一日內園進櫻桃薦寢廟訖頒賜各有差

長安四月已後自堂廚至百司廚通謂之櫻筍廚公餼之盛常日不同

野人間話蜀後主昶每夏四月有遊花院遊錦浦者歌樂掀天珠翠填咽貴門公子華軒彩舫遊百花潭窮奢極麗諸王功臣已下皆置林亭異果名花其樓

臺皆此類也

五代史唐劉延朗傳初廢帝起於鳳翔有瞽者張濛自言事太白山神神魏崔浩也使濛問於神神傳語曰三珠并一珠驢馬沒人驅歲月甲庚午中興戊己土後即位之日歲次甲午四月庚午朔
遼史道宗本紀清寧二年夏四月甲子詔曰方夏長養鳥獸孳育之時不得縱火於郊

玉海建隆二年始置藏冰務而修其祭常以四月命官率太祝用幣以黑牡祭元冥之神乃開冰以薦寢

廟

宋史河渠志洛水貫西京多暴漲漂壞橋梁建隆二年留守向拱重修天津橋成甃巨石爲脚高數丈銳其前以疏水勢石縱縫以鐵鼓絡之其制甚固四月具圖來上降詔褒美

玉海建隆四年四月二十四日丁亥幸玉津園閱諸軍騎射

燕翼貽謀錄太祖皇帝以趙普專權欲置副貳以防察之問陶穀以下丞相一等有何官穀以參知政事

古今圖書集成
參知機務對乾德二年四月乙丑以薛居正呂餘慶
爲參知政事不押班不知印不升政事堂其後至道
元年四月更制令升政事堂知印押班一同宰相
玉海乾德四年四月辛亥南蠻進銅鼓以請內附
開寶九年幸西京四月庚子有事南郊先是霖雨彌
旬及己亥赴齋宮雲物澄霽垂白之民相謂曰不圖
今日覩太平天子儀衛

太平興國三年四月二十六日庚辰駕幸景風門駐
輦觀刈麥移幸玉津園張樂飲羣臣酒

宋史禮志太平興國九年四月幸金明池習水戰帝
御水殿召近臣觀之謂宰相曰水戰南方之事也今
其地已定不復施用時習之示不忘戰耳因幸講武
臺閱諸軍都試軍中之絕技者遞加賜賚遂登瓊林
苑樓陳百戲擲金錢令樂人爭之極歡而罷

雍熙二年四月二日詔輔臣三司使翰林樞密直學
士尚書省四品兩省五品以上三館學士宴於後苑
賞花釣魚張樂賜飲命羣臣賦詩習射賞花曲宴自
此始

雍熙四年四月幸金明池觀水嬉賜從臣飲帝曰雨霽天涼中外無事宜勿惜醉因登苑中樓盡歡而罷玉海淳化元年四月辛亥上親草書飛白書紅綾扇賜宰相樞密使翰林學士尚書丞郎兩省給舍以上各一

燕翼貽謀錄民間訴水旱舊無限制欺罔官吏無從覆實太宗淳化二年詔訴水旱夏以四月三十日爲限日

玉海淳化五年四月朔時雨露足近臣稱賀上謂宰

相膏澤霽霈上天之貺也命以葡萄酒建茶珍果賜近臣詔曰喜此甘澤與卿同慶

至道元年四月二十九日乙巳知通利軍錢昭序表獻部內所產赤烏白兔各一表云烏稟陽精兔昭陰瑞報火德繁昌之兆示金方柔服之符念茲希世之珍罕有同時而見望宣付史館從之上謂侍臣曰烏色正如渥丹信火德之應也

景德元年四月癸酉象州貢銅鼓高一丈八寸闊二尺五寸旁有四耳銜環鏤人騎花蛤椎之有聲

古今圖書集成
景德三年司天監言四月二日戊寅夜初更見天星
色黃出庫樓車騎官西在氏三度鄭之分野壽星之
次後益潤澤按星經瑞星有四其一曰周伯色黃煌
煌然所見之國大昌又按太乙占云王者制禮作樂
內外得宜君上壽考國祚大昌則周伯星出乞付史
館從之

元符宮石刻宋仁宗母李氏夢一羽衣之士跣足從
空而下云來爲汝子時上未有嗣是夕召幸有娠明
年四月十四日生仁宗幼年每穿履鞮卽亟令脫去

長徒步禁中皆呼爲赤脚仙人

玉海大中祥符二年四月七日种放以集賢院學士
歸終南宴餞龍圖閣賜七言詩命學士卽席賦詩作
序令杜鎬援引名臣歸山故事杜鎬誦北山移文以
規放

大中祥符三年四月丁巳龍圖待制陳彭年奉詔纂
歷代帝王集凡正統十五卷閏位十卷上作序賜名
宸章集詔褒彭年

大中祥符五年四月甲辰瑞聖園槐杏連理繪圖以

示輔臣

本草綱目石麵不常生亦瑞物也宋真宗大中祥符五年四月慈州民饑鄉寧縣山生石脂如麵可作餅餌

宋史禮志天禧初詔以大中祥符元年四月一日天書再降內中功德閣爲天禎節一如天貺節尋以仁宗嫌名改爲天祺節

蘇軾乞開西湖狀天禧中王欽若奏以西湖爲放生池禁捕魚鳥爲人主祈福自是以來每歲四月八日郡人數萬會於湖上所沾羽毛鱗介以百萬數皆西北向稽首仰祝千萬歲壽

西湖志餘宋時杭人四月八日放鴿爲太守祈壽蘇軾懷錢塘詩云去年柳絮飛時節記得金籠放雪衣宋史仁宗本紀仁宗大中祥符三年四月十四日生乾興元年以生日爲乾元節

玉海天聖五年四月辛卯賜進士王堯臣等聞喜宴於瓊林苑中使賜御詩又人賜御書中庸篇各一軸自後遂以爲常

天聖八年四月三日乙酉幸瓊林苑賜從官射射於苑亭遂燕從臣是日日旁有五色雲

天聖九年四月二十九日乙巳上御承明殿閱大樂賜樂工錢帛有差先是太常寺以景德中嘗躬案大樂其後頗多增製故請臨觀焉

麟臺故事天聖末國史成始於修史院續纂會要明道二年命參知政事宋綬看詳修纂至慶曆四年四月監修國史章得象上新修國朝會要一百五十卷玉海景祐二年四月八日己未宗正丞趙良規言月

令一歲之間八薦新物周頌潛冬薦魚春獻鮓是其樂章存者通禮著宗廟薦新凡五十餘品詔禮官議曰本朝惟薦冰著常祀呂紀簡而近薄唐令雜而不經於是更定四時所薦凡二十八物卜日薦獻一以開寶禮

慶曆四年四月壬子二十一日判監王拱辰田況王洙余靖等言首善當自京師漢太學二百四十房千八百餘室生徒三萬人唐學舍亦千二百間今取才養士之法盛矣而國子監才二百楹制度陋小不足

古今圖書集成
以容學者請以錫慶院爲太學葺講殿及更衣殿備
乘輿臨幸從之

皇祐二年四月朔幸金明池司天言雲色黃其形輪
困此聖孝感天之應

至和二年四月四日壬辰幸瓊林苑宴射上中的者
十四已而閱騎士射柳枝

治平四年四月壬申神宗出諸州貢物名件自漳州
山薑花至同州楹梓凡四十三州七十種手詔曰四
方入貢雖云古禮考之禹制未有若茲之繁今一郡

歲有三四而至者自今其悉罷之

宋史神宗本紀慶曆八年四月戊寅生於濮王宮祥
光照室羣鼠吐五色氣成雲治平四年以四月十日
爲同天節

禮志神宗以熙寧元年四月十日爲同天節以宅憂
罷上壽惟拜表稱賀明年親王樞密使管軍駙馬諸
司使副詣垂拱殿宰臣百官大國使詣紫宸殿上壽
命坐賜酒三行不舉樂明年以大旱罷同天節上壽
羣臣赴東上閣門表賀中書門下言同天節上壽班

古今圖書集成
自今樞密使副宣徽三司使殿前馬步軍副都指揮使以上共作一班進酒一醖親王宗室使相至觀察駙馬管軍觀察使以上皆赴紫宸殿依本班序立上壽更不赴垂拱殿蓋以管軍觀察使以上及親王駙馬竝於垂拱殿以官序高下各班進酒畢而日晏外朝有班者仍詣紫宸殿議者以爲近瀆改焉而詔袒免以上宗婦聽班賀於禁中

神宗本紀熙寧六年四月乙亥置律學

夢溪筆談熙寧六年有司上言日當蝕四月朔上爲

徹膳避正殿一夕微雨明日不見日蝕百官入賀是日有皇子之慶蔡子正爲樞密副使獻詩一首前四句曰昨夜薰風入舜韶君王未御正衙朝陽輝已得前星助陰沴潛隨夜雨消其敘四月一日避殿皇子慶誕雲陰不見日蝕四句盡之當時無能過之者玉海元豐二年四月癸卯太皇太后幸金明池上扶太皇太后登輦又豫爲百寶酒船於是持以上壽宋史神宗本紀元豐二年夏四月南康軍甘露降眉州生瑞竹

王海元豐七年四月十七日景靈宮言芝草六生於天元殿景靈門中壬辰朝獻至天元殿觀芝草括異志金山忠烈王漢博陸侯姓霍氏吳孫權時一日致疾黃門小豎附語曰國主封界華亭谷極西南有金山鹹塘湖爲民害民將魚鼈食之非人力能防金山故海鹽縣一旦陷沒爲湖無大神護也臣漢之功臣霍某也部黨有力能鎮之可立廟於山吳王乃立廟建炎間建行宮於當湖賜名顯應尤著鄉民祈禱輒應部下錢侯尤爲靈著王以四月十八誕辰浙

之東西商賈舟楫朝獻踵至自四月至中旬末一市爲之鼎沸聞有設祭於松柏間祀其先亡慟哭而反謂之小嶽廟廟中鐵鑄四聖由海而來至今見存宋史哲宗本紀元祐元年四月詔遇科舉令升朝官各舉經明行修之士一人俟登第日與升甲

王海元祐三年四月己卯詔諸路及州各具圖開析建立沿革城壁吏員戶口貢賦山川地里上職方又蘇軾草三制對小殿撤金蓮燭送歸院

石林燕語續法帖跋元祐五年四月十三日祕書省

以祕閣所藏墨跡未經太宗朝纂刻者刊於石有旨從之

宋史律曆志元祐七年四月詔尚書左丞蘇頌撰渾天儀象銘

玉海大觀四年四月二十八日議禮局言開元禮享先蠶幣以黑請從黑以合至陰之義

政和元年四月二十一日於壇側度地築公桑蠶室其親蠶殿名曰無斃

燕翼貽謀錄政和六年四月奉御筆集賢殿舊無此名祕書省殿以右文殿爲名可改爲右文殿修撰玉海政和八年四月二十九日工部員外郎滕康請祕閣四部書以祕書郎掌之列史館於左以法東觀從之

宋史禮志靖康元年四月十三日太宰徐處仁等表請爲乾龍節至日皇帝帥百官詣龍德宮上壽畢卽本宮賜侍從官以上宴

東京夢華錄自三月一日開金明池瓊林苑至四月八日閉池雖大風雨亦有遊人路無虛日

四月八日佛生日十大禪院各有浴佛齋會煎香藥糖水相遺名曰浴佛水迤邐時光晝永氣序清和榴花院落時聞求友之鶯細柳亭軒乍見引雛之燕在京七十二戶諸正店初賣煮酒市井一新唯州南清風樓最宜夏飲初嘗青杏乍薦櫻桃時得佳賓觥酬交作是月茄瓠初出上市東華門爭先供進一對可直三五十千者時果則御桃李子金杏林檎之類玉海紹興元年四月九日賜侍讀王絢胡直儒侍講胡交修御書扇王絢曰霖雨思賢佐丹青憶老臣直

儒曰文物多師古朝廷半老儒交修曰相門韋氏在經術漢臣須

紹興元年四月十三日詔工部以省倉升斗令文思院校定盼其式於諸州

紹興二年詔平江守臣訪求圖籍四月詔分經史子集四庫分官日校

紹興二年四月二十四日上曰朕聞祖宗時禁中有打麥殿今於後圃令人引水灌畦種之亦欲知稼穡之艱

古今圖書集成
紹興三年四月二十一日劉岑請詔求四方遺書從之

紹興七年尹焞給筆札解論語以進八年四月二十日上之

宋史高宗本紀紹興十年四月丙午訪求亡逸曆書及精於星曆者癸亥命部使者歲舉廉吏一人

玉海紹興十一年四月九日賜侍讀吳表臣蘇符新茶

紹興十四年四月六日虔州言木柱內有天下太平

年五字詔送史館十五年作瑞木成文曲

紹興二十五年四月四日製一石斛盼之以革倉庾之弊

真德秀跋紹興己丑之孟夏盱江包敏道遇予粵山之麓縣尹宋侯聞其名延致庠校發揮孟氏要旨是日邑官泊學子會於堂上者凡百數十人聞君講說莫不聳動歎未嘗有學長吳千兕等將以君講義刻於學俾書其後

汎舟錄四月戊辰朔乙亥邑中迎社頗盛云周孝侯

古今圖書集成
生日也

老學庵筆記四月十九日成都謂之浣花遨頭宴於杜子美草堂滄浪亭傾城皆出錦繡夾道自開歲宴遊至是而止故最盛於他時予客蜀數年屢赴此集未嘗不晴蜀人云雖戴白之老未嘗見浣花日雨也續文獻通考宋孝宗乾道三年詔上竺若納講師於四月八日選五十僧入內觀堂行金光明三昧祈福邦家時上於選德殿製觀音讚賜上竺刊於石玉海淳熙四年四月五日靜江守張栻言州有唐帝

祠去城二十里而近山曰堯山虞帝祠去城五里而近山曰虞山臣已新祠宇請著祀典從之

淳熙十二年四月二十六日知潭州林栗進周易經傳集解三十二卷繫辭上下二卷文言說卦序雜本文共爲一卷河圖洛書八卦九疇大衍總會圖六十四卦立成圖大衍揲著解共爲一卷總三十六冊詔付祕省勅書獎諭

乾淳歲時記四月八爲佛誕日諸寺院各有浴佛會僧尼輩競以小盆貯銅像浸以糖水覆以花棚饒鉞

古今圖書集成
交迎遍往邸第富室以小杓澆灌以求施利是日西湖作放生會舟楫盛多略如春時小舟競賣龜魚螺蚌放生

戶部點檢所十三酒庫例於四月初開煮九月初開清先是提領所呈樣品嘗然後迎引至諸所隸官府而散每庫各用疋布書庫名高品以長竿懸之謂之布牌以木牀鐵擎爲仙佛鬼神之類駕空飛動謂之臺閣雜劇百戲諸藝之外又爲漁父習閑竹馬出獵八仙故事及命妓家女使裹頭花巾爲酒家保及有

花裏五熟盆架放生籠養等各庫爭爲新好庫妓之瑋瑋者皆珠翠盛飾銷金紅背乘繡鞵寶勒駿騎各有皂衣黃號私身數對訶導於前羅扇衣笈浮浪閒客隨逐於後少年狎客往往簇餉持杯爭勸馬首金錢綵段霑及輿臺都人習以爲常不爲怪笑所經之地高樓邃閣繡幕如雲累足駢肩真所謂萬人海也宋史理宗本紀淳祐十一年夏四月戊戌潭州民林符三世孝行一門義居詔旌表其門

度宗本紀嘉熙四年四月九日生於紹興府榮邸景

定五年詔以生日爲乾會節

三朝野史四月八日謝太后壽崇節九日度宗乾會節賈似道令黃蛻致語中一聯云神母聖子萬壽無疆亦萬壽無疆昨日今朝一佛出世又一佛出世研北雜志宋鞏洛陵寢歲以四月科柏前期遣官奏告

莫州圖經郝姑祠在莫州莫俗傳郝姑得爲水仙每至四月送刀魚爲信至今四月多有刀魚上來鄉人每到四月祈禱

圖經黎州通望縣每歲孟夏有白鷺鷥一隻墜地古老傳云衆鳥避瘴臨去畱一鷺祭山神

溪蠻叢笑富貴坊競渡預以四月八日下船聚飲江岸舟子各招他客盛列飲饌以相誇大或獨酌食前方丈羣蠻環觀如雲一年盛事名富貴坊

金史太宗本紀天會九年四月詔新徙戍邊戶乏耕牛者給以官牛別委官勸督田作

禮志天德二年命有司議薦新禮依典禮合用時物令太常卿行禮四月薦冰

古今圖書集成
孟鑄傳泰和四年自春至夏諸郡少雨鑄奏今歲愆陽已近五月比至得雨恐失播種之期可依種麻菜法擇地形稍下處撥畦種穀穿土作井隨宜灌漑上從其言區種法自此始

松雪齋集延祐五年四月二十七日上御嘉禧殿集賢大學士臣邦寧大司徒臣源進呈農桑圖上披覽再三問作詩者何人對曰翰林承旨臣趙孟頫作圖者何人對曰諸色人匠提舉臣楊叔謙上嘉賞久之人賜文綺一段絹一匹

北平古今記元英宗延祐七年四月祭遁甲神於香山

歲華紀麗譜四月十九日浣花佑聖夫人誕日也太守出竿橋門至梵安寺謁夫人祠就宴於寺之設廳既宴登舟觀諸軍騎射倡樂導前泝流百花潭觀水嬉競渡官舫民船乘流上下或幕帟水濱以事遊賞最爲出郊之勝清獻公記云往昔太守分遣使臣以酒均給遊人隨所會之數以爲斗升之節自公使限錢茲例遂罷以遠民樂太平之盛不可遽廢以孤其

心乃以隨行公使錢釀酒界之然不逮昔日矣

名勝志觀音山在彭澤縣北一里元至正元年四月

八日雪岩前六花集石壁間現觀音大士跡因立佛

堂山中

楊維禎集乙酉四月二日與蔣桂軒伯仲同泛震澤

大小雷望洞庭之峰吹笛飲酒乘月而歸

真臘風土記四月拋毬

續文獻通考洞庭廟在長沙府磊石山洪武初命有

司每歲四月八日致祭

雙槐歲抄文淵閣芍藥舊嘗有花自景泰增植後未

嘗一開天順改元徐有貞許彬薛瑄李賢同時入為

學士居中一本遂開四花其一久而不落既而三人

皆去惟賢獨留明年各萌芽左二右三中則甚多而

彭時呂原林文劉定之李紹倪謙黃諫錢溥相繼同

升學士凡八人賢約開時共賞夏四月盛開八花遂

設宴以賞之賢賦詩十章閣院官僚咸和彙成曰玉

堂賞花詩集

熙朝樂事四月八日俗傳為釋迦佛生辰僧尼各建

龍華會以盆坐銅佛浸以糖水覆以花亭鈸鼓迎往富家以小杓澆佛提唱偈誦布施財物有高峰和尚偈云呱聲未絕便稱尊攪得三千海嶽昏惡水一年澆一度知他雪屈是酬恩

西吳枝乘吳興以四月爲蠶月家家閉戶官府勾攝徵收及里閭往來相慶弔皆罷不行謂之蠶禁是月也有烏飛其聲曰著山看火湖州民謂之蠶鳥又有小蝦亦以蠶時出市民謂之蠶花蠶熟則絕無矣燕都游覽志先是四月八日梵寺食烏飯朝廷賜羣

臣食不落夾蓋緣元人語也嘉靖十四年帝以其名不雅馴乃賜百官於午門食麥餅宴

帝京景物略四月一日至十八日傾城趨馬駒橋幡樂之盛一如嶽廟碧霞元君誕也立夏日啓冰賜文武大臣編氓得賣買手二銅盞壘之其聲磕磕曰冰盞冰著濕乃消畏陰雨天以綿衣蓋護燠乃不消八日捨豆兒曰結緣十八日亦捨先是拈豆念佛一豆佛號一聲有念豆至石者至日熟豆人徧捨之其人亦一念佛啖一豆也凡婦不見答於夫姑者婢妾擯

於主及姥者則自咎曰身前世不捨豆兒不結得人緣也是日要戒壇游香山玉泉茶酒棚妓棚周山灣澗曲間初說戒者先令僧了願如是今不說戒百年而年則一了願是月榆初錢麵和糖蒸食之曰榆錢糕

出左安門東行四十里石橋五尺曰弘仁橋橋東碧霞元君廟歲四月十八日傳是元君誕辰士女進香鳴金號衆四十里道相屬也

禮部儀制司有優鉢羅花焉金蓮花也開必自四月八日至冬而實如鬼蓮蓬脫去其衣中金色佛一尊者核也

北京歲華記四月十三日上藥王廟諸花盛發白石莊三里河高粱橋外皆貴戚花場好事者邀賓客遊之

長安客話蘆溝橋西北爲灰廠出灰廠入山兩壁夾徑徑盡見山門有高閣在山中央可望渾河閣後有軒度巖上折而右卽戒壇壇在殿內甃石爲之中有高座爲每年說戒之地周圍皆列戒神四月八日游

古今圖書集成
僧畢集聽戒

續文獻通考三仁廟在衛輝府比干廟在衛輝府城北俱每歲四月四日有司祭祀

昌平山水記州西八里爲昌平舊縣今居民不滿百家而唐狄梁公祠香火特盛歲四月朔賽會二三百里內人至者肩摩踵接

名勝志長寧縣南金龜山上有波瀾殿邑人於四月八日取嘉魚泉浴佛故名波瀾也

仙翁鶴草在單縣城東北隅相傳仙翁以四月十四

日誕來遊邑人包九成者於前一日積虔致禱次早果有白鶴四隻從西南來晡時方去自是每仙翁誕期祠側草荊上陡成鶴形日高遂泯至今尙然人傳爲呂翁鶴草云

宛署雜紀四月八日燕京高粱橋碧霞元君廟俗傳是日神降傾城婦女往乞靈祈生子西湖景玉泉碧雲香山遊人相接又傍近有地名秋坡都中伎女競往逐焉俗云趕秋坡

欽定古今圖書集成曆象彙編歲功典

第四十八卷目錄

孟夏部雜錄

孟夏部外編

立夏部彙考

禮記

月令

左傳

青鳥司啓

易通卦驗

立夏節候

當陽雲

孝經緯

斗指東南

樂緯 立夏樂

汲冢周書 時訓解

漢書 天文志

淮南子 天文訓 時則訓

春秋繁露 治水五行篇

後漢書 禮儀志 祭祀志

唐書 禮樂志

宋史 禮志

行軍月令 占五行

農政全書 日暈

遵生八牋 耀仙月占

直隸志書 永平府 肅寧縣 饒陽縣

山東志書 滋陽縣

山西志書 黎城縣

江南志書 常熟縣 休寧縣 嘉定縣 無錫縣 太湖

浙江志書 杭州府 海寧縣 嘉興府 桐鄉 烏程縣 寧波府 紹興府

蕭山縣 新昌縣 台州府 龍泉縣

湖廣志書 攸縣 邵陽縣 桂陽州

福建志書

建陽縣

將樂縣

沙縣

雲南志書

雲南府

河陽縣

立夏部藝文

詩詞

立夏日憶京師諸弟

唐韋應物

立夏日示陳安國宣義

宋郭祥正

立夏

謝邁

山中立夏用坐客韻

文天祥

立夏日晚過丁卿草堂

元周南老

久雨喜晴明日立夏

明胡儼

立夏日山中遍遊後夜宿劉邦彥竹東別墅

沈周

山中立夏即事

以上詩

蔡汝楠

朝中措

立夏日觀茶藤作

宋管鑑

阮郎歸

立夏日詞

明張大烈

立夏部紀事

立夏部雜錄

立夏部外編

歲功典第四十八卷

孟夏部雜錄

詩經周南卷耳章采采卷耳

疏

卷耳葉青白色似胡

荇白華細莖蔓生可煮為茹滑而少味四月中生子

如婦人耳中璫今或謂之耳璫幽州人謂之爵耳是

也

小雅小明章日月方除

箋

四月為除

疏

爾雅除作余

李巡曰四月萬物皆生枝葉故曰余余舒也

日月方奧

箋

四月為奧

大雅韓奕章維筍及蒲疏筍竹萌也皆四月生

左傳龍見而雩注建巳之月蒼龍宿之體昏見東方

萬物始盛待雨而大故祭天遠為百穀祈膏雨

禮斗威儀孟夏驅獸無害五穀

管子輕重已篇以春日始數四十六春盡而夏始

陶朱公書四月十四菖蒲生日修剪根葉無逾此時

宜積梅水漸滋養之則青翠易生尤堪清日

麥門冬葉類莎草長秀根如麥顆連珠種法四月初

採子芟却根去頭半寸許相去約一尺栽一顆入土

一寸半實築四邊常以水灌有草即耘宜夏至前一

日採取

鱖魚盛於四月鮮白如銀其味甘美廣州謂之三鰲

魚

黑豆北方高原之所皆產喂馬極肥故名馬料豆人

食之補腎明目何首烏賴其蒸曬更有功效四月間

撒種

楚辭九章滔滔孟夏兮草木莽莽注滔滔盛陽貌言

四月孟夏純陽用事煦成萬物草木之類莫不莽莽

盛茂

望孟夏之短夜兮何晦明之若歲注四月之末陰盡

極也

九辨收恢台之孟夏兮注恢台長養也注補恢大也台

卽胎也言夏氣大而育物

呂氏春秋孟夏之昔殺三葉而穫大麥注昔終也三

葉薺亭歷薪蕈也是月之季枯死大麥熟而可穫大

麥旋麥也

史記天官書大荒駱歲歲陰在巳星居戌以四月與

奎婁胃昴晨出曰跼踵熊熊赤色有光其失次有應

見亢

董仲舒雨雹對陽德用事則和氣皆陽建巳之月是也故謂之正陽之月

四月陽雖用事而陽不獨存此月純陽疑於無陰故亦謂之陰月自十月以後陽氣始生於地下漸冉流散陰氣轉收遂至四月純陽用事

建巳之月爲純陽不容都無復陰也但是陽家用事陽氣之極耳薺麥枯由陰殺也

古今圖書集成
春秋繁露四祭篇禱者以四月食麥也

汜勝之書黍者暑也種必待暑先夏至三十日此時有雨疆土可種黍一畝三升黍心未生雨灌其心心傷無實黍心初生畏天露令兩人對持長索槩去其露日出乃止

後漢書魯恭傳始夏百穀權輿陽氣胎養之時

張純傳禘祭以夏四月夏者陽氣在上陰氣在下故正尊卑之義也

白虎通五行篇四月律謂之仲呂何言陽氣極將彼

故復中難之也

月令章句自畢六度至井十度謂之實沈之次小滿居之晉之分野

百穀各以其初生爲春熟爲秋故麥以孟夏爲秋

吳氏本草伏翼或生人家屋間立夏後陰乾治目冥令人夜有光

晉書律歷志四月律中中呂亥下生之孟夏氣至則其律應所以宣中氣也

風土記南居細李四月先熟

古今圖書集成
枇杷葉似栗子似葯四月熟

廣州記水弩蟲四月一日上弩射人八月後卸弩
廣志枇杷冬花實黃大如雞子小者如杏味甜酢四
月熟出南安犍爲宜都

破減稷逼麥稷此二者以四月熟

竺法真登羅浮山疏山檳榔一名蒟子幹似蔗葉類
柞一叢千餘幹幹生十房房底數百子四月採

名醫別錄石耆味甘無毒主欬逆氣生石間色赤如
鐵脂四月采

白頭翁生高山山谷及野田四月采

宋書索頭傳其俗以四月祠天

魏書律曆志次卦四月旅師比小畜乾

齊民要術作穡酒法四月取穡葉合花采之還卽急
抑著甕中六七日悉使烏熟曝之煮三四沸去滓內
甕中下麴炊五斗米日中可燥手一兩抑之一宿復
炊五斗米酸之便熟

食膾魚蓴羹芼羹之菜蓴爲第一四月蓴生莖而未
葉名作雉尾蓴第一作肥羹

古今圖書集成
越瓜胡瓜四月中種之

椒熟時收取黑子四月初畦種之治畦下水如種葵法

種葱四月始鋤鋤徧乃翦翦與地平翦欲日起避熱時

愈瘡酒法四月八日用水一石麴一斤擣作末俱酸水中酒酢煎一石取七斗以麴四斤須漿冷酸麴一宿上生白沫起炊秫一石冷酸中三日酒成

種冬葵法自四月八日以後日日翦賣其翦處尋以

手拌斫斷地令其起水澆糞覆之比及翦徧初者還復周而復始日日無窮

崔寔曰四月可作酢

又曰四月收蕪菁及芥葶蘆冬葵子

舊唐書白居易傳木蓮大者高四五丈巴民呼爲黃心樹經冬不凋身如青楊有白文葉如桂厚大無脊花如蓮香色艷膩皆同獨房藥有異四月初始開自開迨謝僅二十日

本草拾遺紫藤四月生紫花可愛長安人亦種之庭

古今圖書集成

也
食譜張手美家四月八日指天餒餽
種樹書種蓮先以羊糞壤地於立夏前兩三日種當年便著花

酉陽雜俎四月四日勿伐樹木

焉者四月十五日遊林

嶺表錄異梧州西有火山產荔枝四月子丹以其地熟故曰火山

周易集解乾爲大赤崔憬曰乾四月純陽之卦故取

盛陽色爲大赤

乾上九亢龍有悔干寶曰陽在上九四月之時也亢過也

風以散之荀爽曰謂建巳之月萬物上達布散田野食療本草鱔魚初夏時有餘月則無故名

四時纂要四月也是謂乏月冬穀旣盡夏麥未登宜振乏絕救饑窮九族不能自活者救之

茶譜湘人四月采楊桐草搗汁浸米蒸作飯食必采石南芽爲茶飲乃去風也

古今圖書集成
蜀本草白頭翁所在有之有細毛不滑澤花葉黃四月采實日乾

宋史河渠志四月末壟麥結秀擢芒變色謂之麥黃水

本草衍義梧桐四月開嫩黃小花一如棗花枝頭出綠墜地成油沾漬衣履

談苑江南民於四月一日至四日十一歲之豐凶云一日雨百泉枯言旱也二日雨傍山居言避水也三日雨騎木驢言踏車取水亦旱也四日雨餘有餘言

大熟也

嬾真子錄小滿四月中謂麥之氣至此方小滿而未熟也

圖經本草落雁木雅州出者苗作蔓纏繞大木苗葉形色大都似茶無花實彼人四月采苗入藥用

芥心草生淄州引蔓白色根黃色四月采苗葉搗末治瘡疥甚效

白鮮苗高尺餘莖青葉稍白如槐亦似茱萸四月開花淡紫色似小蜀葵花根似小蔓菁皮黃白而心實

古今圖書集成
山人採嫩苗爲菜茹

黃精葉如竹葉而短兩兩相對莖梗柔脆頗似桃枝
本黃末赤四月開細青白花如小豆花狀子白如黍
根如嫩生薑黃色

栗四月開花青黃色長條似胡桃花

埤雅廣要橫州之地楓始生葉有蟲食之其形似蠶
四月間熟亦如蠶之將絲州人攀取其絲光明如琴
絃

物類相感志青梅過小滿黃蜀葵過小滿則長蠶過

小滿則無絲

東坡詩注成都太守自正月十日出遊至四月十九
日浣花乃止

岳陽風土記岳州瀕江諸廟皆有船四月中擇日下
水擊畫鼓集人歌以權之至端午罷

緗素雜記嘗怪筆談論正陽爲兩事正謂四月陽謂
十月乃引日月陽止爲証又謂先儒以日食正陽之
月正謂四月爲不然按爾雅月名十月爲陽則謂十
月爲陽月可矣然以正陽爲兩事誤也余考舒王字

古今圖書集成
說云巳正陽也無陰焉又詩七月新傳解四月秀萸處云四月正陽也秀萸言月何也秀萸以言陰生也陰始於四月生於五月而於四月言陰生者氣之先至者也又正月繁霜處云夏之四月謂之正月又詩義云此所言皆夏時者蓋夏時據人所見所謂人正也由此觀之四月建巳之月巳爲正陽則正陽止謂四月明矣存中之說可不攻而自破又按西京雜記云陽德用事則和氣皆陽建巳之月是也故謂之正陽之月又歐公歸田錄云景祐六年日蝕四月朔以

謂正陽之月自古所忌皆以四月爲正陽之月其理甚明

爾雅翼苧米可爲飯生水田中苗子似小麥而小四月熟久食不饑

麥門冬生山谷肥地葉如韭四季不凋根有鬚作連珠形似穉麥穎故名麥門冬四月開花淡紅如紅蓼花實圓碧如珠

周益公日記四月初八晴料峭高田好張鈞四月初八烏漉禿不論上下一齊熟

古今圖書集成
演繁露細素雜記靖康間閩人黃朝俊所作也辨正
世傳名物音義多有歸宿而時有闕疑者至釋宋子
京刈麥詩以四月而曰爲麥秋按北史蘇綽傳麥秋
在野其名遠矣是未嘗讀月令也以此見博記之難
衛生易簡方眼昏四月內取風落小胡桃每日午時
食飽以無根水吞下臥覺鼻孔中有泥腥氣爲度
山家清供夏初竹笋盛時就竹邊煨熟其味甚鮮名
曰傍林鮮文與可守洋州正與家人煨竹午飯忽得
東坡書詩云想見清貧饒太守渭濱千畝在曾中不

覺噴飯滿案想作此供也

通考朔日值小滿主凶災大風雨主大水小則小水
晴主旱

初八日看陰晴卜水旱最宜密雲不雨

十四日晴主歲稔黃昏時日月對照主夏秋旱

十六日看月卜水旱上早無雲紅色主大旱遲而白
色主水夜深主大水有雲主草多雲黑主有蟹諺云
有穀無穀但看四月十六又云月上早低田收好稻
月上遲高田剩者稀

古今圖書集成
十六夜月當午立一丈竿量月影若過竿主雨水多
沒田夏旱人饑長九尺主三時雨水八尺主六月雨
水七尺主低田大熟高田半收五尺夏旱四尺主蝗
三尺主人饑

庚溪詩話江南五月梅熟時霖雨連旬謂之黃梅雨
少陵詩南京西浦道四月熟黃梅湛湛長江去冥冥
細雨來蓋唐人以成都爲南京則蜀中梅雨乃在四
月也

筍譜渭川筍史記曰渭川千畝竹其人與千戶侯等

筍晚四月方盛

慈竹筍四月生江南人多以灰煮食之

野客叢談細素雜記載宋子京有皇帝幸南園觀刈
麥詩曰農扈方還夏官田首告秋注云臣謹按物熟
謂之秋取秋斂之義故謂四月爲麥秋百穀各以初
生爲春熟爲秋麥以初夏熟故以四月爲麥秋此說
見蔡邕月令章句

紀曆撮要有利無利只看四月十二此日宜晴忌西
南風吹足百錢動若東南風吹動足百錢十分好

古今圖書集成
虛谷間抄湘潭界中有寺名方廣每至四月朔日在
東壁則照見維揚宮府樓堞居民舍宇物物可數
蕪史四月四日進不落夾用葦葉方包糯米長可四
寸闊一寸味與粽同

荔枝譜火山本出廣南四月熟味甘酸而肉薄穗生
梗如枇杷閩中近亦有之山在梧州

餅史月表四月花盟主芍藥薝蔔夜合花客卿石嵒
罌粟玫瑰花使令刺牡丹粉團龍爪垂絲海棠虞美
人棟樹花

花曆四月牡丹王芍藥相於階罌粟滿木香上升杜
鵲歸荼蘼香夢

月令演四月飲酎上旬龍華會八日菖蒲誕十四日櫻筍廚十五日

結夏 浣花潭十九

田家五行小分龍日卽二十日晴分懶龍主旱雨分
健龍主水東南上下大熟西北風分白龍主大水東
北風分青龍主小水

田家雜占夏初食鯽魚脊骨有曲主水

夏初水底生苔主有暴水諺云水底起青苔卒逢暴

古今圖書集成
水來

田家曆四月正屋漏以備暴雨

農政全書種大豆鋤成行壟春穴下種早者二月種
四月可食名曰梅豆

本草綱目今人不知女貞但呼爲蠟樹立夏前後取
蠟蟲之種子裹置枝上半月其蟲化出延緣枝上造
成白蠟民間大獲其利

勒魚出東南海中以四月至漁人設網候之聽水中
有聲則魚至矣有一次二次三次乃止狀如鮐魚小

首細鱗腹下有硬刺如鮐魚腹之刺頭上有骨合之
如鶴喙形乾者謂之勒鯨

夏枯草葉似旋覆三月四月開花作穗紫白色似丹
參花結子亦作穗五月便枯四月采之

木半夏樹葉花實及星斑氣味竝與盧都同立夏後
始熟故吳楚人呼爲四月子亦曰野櫻桃

烏飯乃仙家服食之法今之釋家多於四月八日造
之以供佛

羣芳譜箬蘭葉似箬花紫形似蘭而無香四月開與

石榴紅同時

木蘭葉似茵桂厚大無脊有三道縱紋皮似板桂有縱橫紋花似辛夷內白外紫四月初開二十日卽謝不結實

眞珠蘭一名魚子蘭色紫蓓蘂如珠花開成穗其香甚濃四月內節邊斷二寸插之卽活以魚腥水澆之則茂

山丹根似百合體小而瓣少莖亦短小葉狹長而尖頗似柳葉與百合迥別四月開紅花六瓣亦結小子

草花譜木香花開四月種有三其最紫心白花香馥清潤高朶萬條望若香雪其青心白木香黃木香皆不及也

書蕉月昔靡草死按呂氏春秋孟夏之昔注昔終也巖棲幽事四時之景莫如初夏余嘗夜飲歸作增減字浣溪沙云梓樹花香月半明棹歌歸去蟪蛄鳴曲曲柳灣茅屋矮挂魚罾笑指吾廬何處是一池荷葉小橋橫燈火紙牕修竹裏讀書聲
神隱小滿初候吳葵華

小丹丘客談京師田雀以四月肥背有黃羽與江鄉
純色者別而以江南食法製之亦甚肥美
名勝志蕭縣東南二十五里有廟橋橋北一里有天
棗樹枝幹蟠屈數百年物正二月之交開小花結實
如酸棗可食四月初七日全樹皆熟初八日遂空
一統志杭州府千頃山西有莎蘿花一株四月花開
香聞數里

閩部疏漳州氣候最煖草木皆先時華余以四月抵
郡廨中盛有所植盤飴間頗不乏味崇蘭桂子茉莉
薝蔔一時並開荔子蕉黃舊橘新李同案而薦紫茄
蒂於陳根王瓜枯爲薜草誠寰中之異境也

孟夏部外編

佛書四月廿一日普賢菩薩誕廿八日藥王誕

續博物志佛者本號釋迦文即天竺釋迦衛國王之子於四月八日夜從母右脇而生有三十二相當周莊王九年魯莊公七年四月常星不見夜明是也漢武內傳元封元年四月戊辰帝閒居承華殿東方朔董仲舒在側忽見一女子著青衣美麗非常帝愕然問之女對曰吾墉宮玉女王子登也向為王母所使從崑崙山來帝問東方朔曰是西王母紫蘭宮玉

古今圖書集成
女昔出配北燭仙人近又名還使領命祿真靈官也
三吳記吳少帝五鳳元年四月會稽餘姚縣百姓王
素有室女年十四美貌鄰里少年求娶者頗衆父母
惜而不嫁嘗一日有少年姿貌玉潔年二十餘自稱
江郎願婚此女父母愛其容質遂許之問其家族云
居會稽後數日領三四婦人或老或少者及二少年
俱至素因持資財以爲聘遂成婚媾已而經年其女
有孕至十二月生下一物如絹囊大如升在地不動
母甚怪異以刀剖之悉白魚子素因問江郎所生皆

魚子不知何故素亦未悟江郎曰吾所不幸故產此
異物其母心獨疑江郎非人因以告素素密令家人
候江郎解衣就寢收其所著衣視之皆有鱗甲之狀
素見之大駭命以巨石鎮之及曉聞江郎求衣服不
得異常詬罵尋聞有物偃蹠聲震於外家人急開戶
視之見牀下有白魚長六七尺未死在地撥刺素斫
斷之投江中女後別嫁

真仙通鑑衡嶽洞門觀在石廩峰西石榴峰南下昔
施真人施存自號胡浮先生或云婉盆子師黃盧子

古今圖書集成
得三皇內文役御虎豹之術遁變化景之法或隱或顯數百年慕石廩洞門是其冲真之地乃居之又於峰西石室造閣瓦空十餘丈出乘白豹或步還山豹卽迎之以晉惠帝永康元年四月七日乘豹昇天真誥興寧四年丙寅四月二十七日夜晉司徒文康公舒之女魏夫人降楊羲家

法苑珠林東晉孝武寧康三年四月八日襄陽檀溪寺沙門釋道安于郭西精舍鑄造丈八金銅無量壽佛明年嚴飾成就鎮軍將軍郗恢之創蒞襄部贊擊

福門其像夜出西遊萬山遺示一迹印文入石衆咸駭異恢乃改名金像寺至梁普通三年四月八日下勅於建興苑鑄金銅華趺泝流送之以承像足立碑頌德劉孝義文蕭子雲書天下稱最

神僧傳釋阿禿師不居寺舍出入民間語譎必有徵驗齊神武患其漏洩軍務執置并州城內遣人防守當月城三門各有一禿師盪出遮執不能禁未幾有人從北州來云禿師四月八日於雁門郡市捨命郭下衆以香花送之埋於城外并州人笑之云四月八

古今圖書集成
日禿師從汾橋東出一脚有鞋一脚徒跣但不知入何坊巷人皆見之何云雁門死也此人復往北州報語衆共開塚看之惟見一隻履鞋耳
雲笈七籤木文天尊者開元七年蜀州新津縣新興尼寺四月八日設大齋聚食之次有一道流後至就衆中坐衆人輕侮之不與設齋齋畢道流起入佛殿良久不出人皆異之爭入殿尋求無復蹤跡忽見道流隱形在殿柱中隱隱分明以刀斧削之益加精好其像於殿柱中自然而見

立夏部彙考

禮記

月令

孟夏之月 是月也以立夏先立夏三日太史謁之天子曰某日立夏盛德在火天子乃齊立夏之日天子親帥三公九卿大夫以迎夏於南郊還反行賞封諸侯慶賜遂行無不欣說

陳注迎夏南郊祭炎帝祝融也

左傳

古今圖書集成
青鳥司啓

郊子曰少皞摯爲鳥師而鳥名青鳥氏司啓者也

注青鳥鷓鴣也 疏立夏謂之啓此鳥以立春鳴立

夏止故以名官使之主立夏

易通卦驗

立夏節候

立夏清明風至暑鵲鳴博穀飛電見龍升天

注龍心星名

當陽雲

立夏當陽雲出觜赤如硃

孝經緯

斗指東南

穀雨後十五日斗指辰東南維爲立夏

樂緯

立夏樂

巽主立夏樂用笙

汲冢周書

時訓解

古今圖書集成

曆象彙編歲功典第四十八卷立夏部彙考之二

古今圖書集成
立夏之日螻蛄鳴螻蛄不鳴水潦淫漫是爲陰慝
漢書

天文志

月有九行立夏南從赤道

淮南子

天文訓

穀雨加十五日斗指常羊之維則春分盡故曰有四
十六日而立夏大風濟音比夾鍾

時則訓

立夏之日天子親率三公九卿大夫以迎歲於南郊
還乃賞賜封諸侯修禮樂饗左右

春秋繁露

治水五行篇

立夏舉賢良封有德賞有功出使四方無縱火

後漢書

禮儀志

立夏之日夜漏未盡五刻京都百官皆衣赤
立夏郡國上雨澤

祭祀志

立夏之日迎夏於南郊祭赤帝祝融車旗服飾皆赤歌朱明八佾舞雲翹之舞

注月令章句曰南郊去邑七里因火數也 皇覽

曰自春分數四十六日則天子迎夏於南堂距邦七里堂高七尺堂階二等赤稅七乘旗旄尚赤田車載戟號曰助天養唱之以徵舞之以鼓鞀此迎夏之樂也

唐書

禮樂志

立夏祀赤帝以神農氏配熒惑三辰七宿祝融氏之位如青帝

宋史

禮志

立夏祀赤帝以帝神農氏配祝融氏熒惑三辰七宿從祀

立夏日祀南嶽衡山於衡州南鎮會稽山於越州南海於廣州江瀆於成都府

古今圖書集成
行軍月令

占五行

立夏日得金五穀不成夏旱多風得木夏寒草生得火多妖言兵戈起得土遠臣朝國無政令得水上下相和順天下安寧

農政全書

日暈

立夏日看日暈有則主水

遵生八牋

臞仙月占

四月立夏日忌北風主疫

直隸志書

各省風俗同者不載

永平府

立夏日占日暈則水多是日入海捕魚視西南風則多獲東北風不利若值朔主地動

肅寧縣

立夏風從東來雷電多南風年豐西風蝗蟲人不安北風泉湧地動日麗風和來日雨多凡風從夜半起

古今圖書集成
者必狂日內息者不和又曰東風急備蓑笠凡風單
日起單日止雙日起雙日止又云立夏西南風六十
日扳耨

饒陽縣

立夏東風主猪灾牛死南風主田茂盛西風主暴雨
傷禾北風主山上行船又立夏日青氣見東南方吉
否則歲多灾又立夏日宜雨諺云立夏不下高田莫
耙

山東志書

滋陽縣

四月節立夏邑人咸入鄉處就農桑業

山西志書

黎城縣

立夏日白巖牡丹放士人皆置酒遊賞

江南志書

常熟縣

立夏日煮麥豆和糖食之曰不疰夏

嘉定縣

古今圖書集成
立夏之日男女各試葛衣乞鄰家麥爲飯云解疰夏之疾

無錫縣

立夏合七家米食之云不病暑

太湖縣

立夏日俗以是日取笋莧爲羹舉家食之相戒少長毋坐門限謂令足軟毋晝寢謂愁夏多倦病也

休寧縣

立夏日宜雨諺云立夏不下高田放罷小滿不滿芒

種不管

浙江志書

杭州府

立夏有新茶新筍朱櫻青梅等物雜以枝圓棗核諸果鏤刻花草人物極其工巧各家傳送謂之立夏茶民間所食臘肉火酒海螵燒餅之屬

海寧縣

立夏日以諸果品雜置茗椀親鄰彼此餽送名曰七家茶亦古八家同井之義

古今圖書集成
嘉興府

立夏以百草芽採粉爲餅相餽遺

桐鄉縣

四月立夏日噉新梅蠶豆櫻桃粉餅云夏天無病

烏程縣

四月立夏日家多祀竈以火德王也時蠶已三眠稍
葉者三日後任從採摘

寧波府

立夏炊五色米爲立夏飯

紹興府

丐戶以立夏日出鮮衣鼓笛相娛非此類別以爲恥

蕭山縣

立夏忌坐門限謂不利於脚

新昌縣

立夏炙昌魚薤菜

台州府

立夏各拭麵爲薄餅裹肉菹啖之謂之醉夏

龍泉縣

古今圖書集成
立夏日大晴旱東風穀熟人安南風人疫亢旱西風
六畜災北風魚多

湖廣志書

攸縣

立夏日民間食鴨蛋媼族分餉用爲酬酢涉跡四方
少有此俗唯見鄴中記云寒食日俗皆畫鴨子以相
餉寒食在冬至後百有五日去夏不遠或遺意也

邵陽縣

立夏日有雨則旱

桂陽州

立夏親鄰治酒會飲

福建志書

建陽縣

四月朔立夏主麥惡米貴

將樂縣

立夏採新蔬笋作羹以薦先日夏羹其日忌用牛力

沙縣

四月立夏日農家作夏團米爲飮食之謂之助力

雲南志書

雲南府

立夏日插皂筴枝紅花於戶以厭祟又各家圍灰於牆脚以辟蛇

河陽縣

立夏日邑之人士攜酒挈盒往遊西浦四方雜還而至者甚衆爭赴碧潭沐浴俗謂可以祛災竝效祓禊故事又剪綵爲桃樣或葫蘆樣縫於小兒衣後俗謂可以祛瀉痢

立夏部藝文

詩詞

立夏日憶京師諸弟

唐韋應物

改序念芳辰煩襟倦日永夏木已成陰公門晝恆靜長風始飄閣壘雲纔吐嶺坐想離居人還當惜徂景
立夏日示陳安國宣義

宋郭祥正

昨日春歸盡輕衣畏暑侵落花空眷影新葉自成陰晝永惟便睡蟬清稍伴吟小團宮樣茗分酌莫辭深
立夏

謝邁

小簟含風六尺牀竹奴從此合專房吾身匏落都無

古今圖書集成
用占得山間一味涼

山中立夏用坐客韻

文天祥

歸來泉石國日月共溪翁夏氣重淵底春光萬象中
窮吟到雲黑淡飲勝裙紅一陣絃聲好人間解慍風
立夏日晚過丁卿草堂
元周南老
江上茅堂柳四垂又逢旅次過春時雨多苔蝕懸琴
壁水滿蛙生洗硯池風浦蕭蕭帆過疾煙空漠漠鳥
來遲避喧心事何人解牕下幽篁許獨知

久雨喜晴明日立夏

明胡儼

一月厭雨聲忽逢今日晴春從花上去風過竹間清
睡美新茶熟身閒野服輕近來多坦率客至倦逢迎
立夏日山中遍遊後夜宿劉邦彥竹東別墅

沈周

乍認東莊路不真有橋通市却無鄰山窮借看堂中
畫花盡來尋竹主人爛熳箋麻發新興畱連櫻筍送
殘春與君再見當經歲分付清觴緩緩巡

山中立夏卽事

蔡汝楠

一樽開首夏獨對落花飛幽僻還聞鳥清和未換衣

綠帷槐影合香飯藥苗肥盡日柴門啓蠶家過客稀

朝中措

立夏夏日觀
茶蘼作

宋管鑑

一年春事到茶蘼何處更花開莫趁垂楊飛絮且隨
紅藥翻階 倦遊老矣肯因名宦孤負銜杯寄語故
園桃李明年畱待歸來

阮郎歸

立夏

明張大烈

綠陰鋪野換新光薰風初晝長小荷貼水點橫塘蝶
衣曬粉忙 茶鼎熟酒卮揚醉來詩興狂燕雛似惜
落花香雙銜歸畫梁

立夏部紀事

周禮春官大宗伯以赤璋禮南方訂義鄭康成曰禮南

方以立夏謂赤精之帝炎帝祝融食焉半圭曰璋象

夏物半死鄭鍔曰陰生於午終於子午者南方之正

位陽方用事而陰已生則夏者陰陽各居其半禮以

半圭見陰功居其半不言祀中央者熊氏以為中央

黃帝亦用赤璋然以類求神中央土色宜用黃孔氏

以為當用黃琮然則土與地一類故不言易氏曰璋

明也其色以赤象物之相見乎離南方之義也

晉書禮志成帝咸和六年三月有司奏今月十六日立夏今正服漸備四時讀令是祇述天和隆殺之道謂今故宜讀夏令奏可
雷公藥對立夏之日蜚蠊先生爲人參伏苓使主腹中七節保守中和

隋書禮儀志隋迎氣赤郊爲壇國南明德門外道西去宮十三里以立日記其方之帝

隋制於國城西南八里金光門外爲雨師壇祀以立夏後申

會稽志隋開皇十四年詔南鎮會稽山就山立祠天寶十載封會稽山爲太興公歲一祭以南郊迎氣日唐書禮樂志立夏後申日記雨師

韓愈南海神廟碑天寶中冊尊南海神爲廣利王因其故廟易而新之在今廣州治之東南海道八十里扶胥之口黃木之灣常以立夏氣至命廣州刺史行事祠下事訖驛聞

玉海雍熙元年立夏致享太一宮祠官咸集甘露降祠庭

古今圖書集成
金史禮志立夏望祭南嶽衡山南鎮會稽山於河南府南海南瀆大江於萊州

元史祭祀志至元七年大司農請於立夏後申日祭雷雨師於西南郊

熙朝樂事立夏之日人家各烹新茶配以諸色細果餽送親戚比鄰謂之七家茶富室競侈果皆雕刻飾以金箔若茉莉林檎薔薇桂蕊丁檀蘇杏盛以哥汝瓷甌僅供一啜而已

立夏部雜錄

易通卦驗立夏雀子飛

月令章句自畢六度至井十度謂之實沈之次立夏居之晉之分野

抱朴子仙藥篇樊桃芝其木如昇龍花葉如丹羅實如翠鳥高不過五尺生於名山之陰東流泉水之上以立夏之候伺之得而未服盡一株得五千歲也雜應篇或問不熱之道答曰以立夏日服六壬六癸之符或行六癸之炁或服元冰之丸或服飛霜之散

然此用簫丘上木皮及五月五日中時北行黑蛇血故少有得合之者也唯幼伯子王仲都二人衣以重裘暴於夏日周以十二鑪之火口不稱熱身不流汗蓋用此方者也

三禮義宗四月立夏為節夏大也至此之時物已長大故以為名

齊民要術崔寔曰四月立夏後可作鮑魚醬

三月清明節後十日封生薑至四月立夏後蠶大食芽生可種之

隋書禮儀志夏迎赤燿怒者火色燿怒其靈炎至明盛也

唐書曆志立夏日在井四度昏角中南門右星入角距西五度其左星入角距東六度故曰四月初昏南門正昴則見

周易集解齊乎巽崔憬曰立夏則巽王而萬物絜齊正易心法地二生火離之氣孕於巽木立夏節也

退齋雅聞錄河朔人謂立夏雨為隔轍雨

元池說林立夏日俗尚啖李時人語曰立夏得食李

古今圖書集成
能令顏色美故是日婦女作李會取李汁和酒飲之
謂之駐色酒一日是日啖李令不疰夏

通攷朔日值立夏主地動又曰此日雨主有重種兩
禾之患

立夏日風東來雷電多南來年豐歲安西來人衆不
安北來泉涌地震

紀曆撮要立夏日無暈無水有暈主做湖塘

五雜組俗有立夏分龍之說蓋龍於是時始分界而
行雨各有區域不能相踰故有咫尺之間而晴雨頓

殊者龍爲之也

田家五行野薔薇開在立夏前主水

名勝志六石峰在永豐縣東永平鄉上有六石對峙
高峻插天中有聖泉每歲以立夏七日應期而至有
聲如雷則爲年豐之兆過期則旱

立夏部外編

登真隱訣立夏之日日中五帝會諸仙人於紫微宮
見四真人論求道之人罪

三道順行經洞陽宮日之上館也立夏之日止於洞
陽宮吐金冶之精以灌東井之中沐浴於晨暉收八
素之風歸廣寒之宮

